

Lao Hamutuk: Lei Grande Opsaun La Konsidera Impaktu OJER 2022

neonmetin.info/buletin/2022/05/26/lao-hamutuk-lei-grande-opsaun-la-konsidera-impaktu-ojer-2022/

May 26, 2022

La'o Hamutuk husu Ministériu Finansas atu hadi'a no atualiza informasaun kona-ba projesaun ba despeza no reseita ba futuro. Luta Hamutuk nota katak Proposta Lei ida ne'e uza dadus finanseiru impaktu OJER 2022 nian. Lia hirak ne'e Lao Hamutuk hato'o liu hosi nia Karta Aberta ba Deputadu/a iha Parlamentu Nasional, 24 Maiu 2022.

Lao Hamutuk publika iha ninia Komunikadu Imprensa horiseik (25/05) kontiudu hosi ninia Karta Aberta ne'ebe hato'o katak atu kontribui ba diskusaun no avaliasaun ba dezeńu diresaun Polítiku ida ne'ebé realistíku, ekitável no sustentável liu.

“La'o Hamutuk husu Ministériu Finansas atu hadi'a no atualiza informasaun kona-ba projesaun ba despeza no reseita ba futuro. Ami nota katak Proposta Lei ida ne'e uza dadus finanseiru ne'ebé la inklui impaktu husi Orsamentu Retifikativu 2022, ne'ebé aumenta OJE 2022 ba biliaun \$1.24. Iha ezbosu Lei nia laran, iha mós informasaun ne'ebé la konsistente, no ami preokupa katak projesaun ba reseita iha futuro inklui reseita la mai serteza, ka la iha evidénsia”, Komunike ne'e esplika.

Lao Hamutuk mos inklui iha Karta Aberta nia laran, informasaun kle'an tan kona ba preokupasaun hirak ne'e, no husu Ministériu Finansas atu fornese informasaun kompletu kona-ba sira nia estimasaun hirak ne'e, atu ajuda Membru Parlamentu no públiku bele avalia proposta ida ne'e, no komprende realidade situasaun finansas estadu inklui impaktu husi proposta lei ida ne'e.

Iha Karta Aberta, Lao Hamutuk identifika mos proposta programa importante liu atu sai prioridade iha OJE 2023, inklui agrikultura ne'ebé orienta ba konsumsaun lokál, edukasaun, saúde, no bee mós no saneamentu. Hafoin Fundu Petrolíferu mamuk, sei la iha osan tan atu investe iha setór xave sira. Nune'e mak ita preziza uza oportunidade ida ne'e atu investe iha povu.

La'o Hamutuk: Komponente Projetu Tasi Mane Labele Sai Prioridade OJE 2023

“Projetu Tasi Mane iha hela inserteza nia laran. La iha razaun atu aloka osan ba dezlokasaun komunidadade se viabilidade projetu ne'e seidauk klaru. Presiza prioritiza estudu independente kona ba kustu, benefisiu, no risku molok aloka osan tan ba implementasaun”, Lao Hamutuk hatete iha nia Komunikadu Imprensa (25/05).

Lao Hamutuk publika iha ninia Komunikadu Imprensa horiseik (25/05) kontiudu hosi ninia Karta Aberta ne'ebe hato'o mos katak programa balun ne'ebe Lao Hamutuk konsidera la bele sai prioridade iha OJE 2023, inklui aeroportu regional sira no komponente Projetu Tasi Mane.

“Ezbosu lei Grande Opsaun inklui “aquisição de terrenos e reassentamento da população”, maibé Projetu Tasi Mane iha hela inserteza. La iha razaun atu aloka osan ba dezlokasaun komunidadade se viabilidade projetu ne'e seidauk klaru. Presiza prioritiza estudu independente kona ba kustu, benefisiu, no risku molok aloka osan tan ba implementasaun, hanesan ANPM no TimorGAP fó kometimentu atu realiza”, Lao Hamutuk esplika iha nia komunike laran.

Lao Hamutuk mos hatutan dehan, proposta Lei ida ne'e mós inklui estensaun auto-estrada iha Costa Súl ne'ebe liga ho Projetu Tasi Mane. Konstrusaun faze primeiru realiza ho kustu tokon \$350 ba 30 km de'it – ho kualidade ne'ebe la di'ak no daudaun ne'e kondisaun balu hahú aat ona. Se Governu propoin atu kontinua harii auto-estrada ida ne'e, karik kustu tomak bele to'o \$1.3 biliaun – maske estudu independente ba projetu ida ne'e seidauk hala'o. Mosu dúvida boot, benefisiu saida mak sei fó ba povu, no oinsá mak impaktu ba sustentabilidade finanseiru?

Komunikadu Imprensa Lao hamutuk nian esplika liliu Karta Aberta ne'ebe Lao Hamutuk hato'o ba deptadu/a sira iha 24 Maiu 2022. Halo ida ne'e, La'o Hamutuk hakarak atu kontribui ba avaliasaun no diskusaun ba dezeńu dire-saun Polítiku ida ne'ebe realistíku, ekitável no sustentável liu.